

## Siunnersuummut oqaaseqaatit

### **Nalinginnaasumik oqaaseqaatit**

#### **1. Aallaqqaasiut**

Kalaallit Nunaannut pinerluttulerinermik inatsimmik nutaamik 1. januar 2010-mi eqqussisoqarnerata kingorna nipangiussisussaataaneq pillugu suliassat suliarineqartarnerat pillugu inatsimmi aalajangersakkat arlallit iluarsineqarnissaat pisariaqarpoq. Inatsimmi pinerluttulerinermik inatsimmut innersuussinerit pinerluttulerinermik inatsimmut massakut atuuttumut naapertuuttunngorlugit matumuuna nalunaarutigineqarput. Siunnersuuteqarnikkut inatsisitigut massakut atuuttuni allannortitsinissaq eqqarsaataannngilaq.

Peqataanik namminersorneq pillugu inatsisip eqqunneqarnerata kingorna Naalakkersuisunut aamma Kalaallit Nunaanni Namminersorlutik Oqartussanut taaguutit suliat suliarineqartarnerat pillugu inatsimmi naapertuuttunngorput.

#### **2. Siunnersuummi pingaarnertut immikkoortut**

##### **2.1 Inatsit atuuttoq**

Aalajangersagaq atuuttoq malillugu inuit pisortani atorfeqartut nipangiussisussaataapput pinerluttulerinermik inatsimmi § 29 malillugu. Suliassat suliarineqartarnerat pillugu inatsisip akuersissutigineqarneranut atatillugu siusinnerusukkut pinerluttulerinermik inatsimmi § 29-mi atuuttumi atuutsinneqartoq inunnut tamanut pisortani sulisunut atorfeqartunullu atuutsinneqalerpoq. Peqataanik aalajangerneqarpoq nipangiussisussaataaneq inunnut pisortat ingerlatsiviini utaqqiisaasumik ilaannakortumilluunniit suliffeqartitaasunut kiisalu pissutissaqartillugu inunnut suliffeqarfinni imminut pigisuni sulisunut atuutsinneqassasoq. Aammattaaq paasissutissanik isertuussanik oqartussaaffiup inunnut pineqartunut ingerlatitseqqinnera eqqarsaatigalugu pinerluttulerinermik inatsimmi aalajangersakkat malillugit inuit pisortat ingerlatsinerisa iluanni sulisut taakkualu ikiortaat nipangiussisussaataanerit ilaatinnaasunut ingerlatsinerit oqartussaaffiup aalajangiisinaanera tunngavissaqalerpoq.

##### **2.2 Siunnersuutip ilusilersornera**

Eqqartuussiveqarnerup iluarsartuunneranut atatillugu danskit Folketingianni Kalaallit Nunaannut pinerluttulerinermik inatsit nutaaq akuersissutigineqarpoq, inatsit nr. 306, 30. april 2008-meersoq, 1. januar 2010-mi atuutilersinneqartoq. Kalaallit Nunaannut pinerluttulerinermik inatsit nutaaq nipangiussisussaataanerit aalajangersakkanik erseqqissaasunik arlalinnik imaqarpoq, tamakkulu suliassat suliarineqartarnerat pillugu inatsimmi aalajangersakkamut atuuttumut naapertuupput. Pinerluttulerinermik inatsit nutaaq malillugu inuit pisortanit sulisussannngortitaallutik suliffimmik ingerlataqartut ingerlataqarnikulluunniit imaluunniit inuussutissarsiummik ingerlataqartut pinerluttulerinermik inatsimmi nipangiussisussaataanerit aalajangersakkanut

ilanngunneqarput. Ilanngullugu aamma pinerluttulerinermik inatsimmi § 52-imi erseqqissarneqarpoq sulisorineqartut aamma nipangiussisussaataitanermut ilanngunneqassasut. Kiisalu nipangiussisussaataitanerup ingerlateqqinneqartussaananik pissutsit pinerluttulerinermik inatsimmi erseqqissarneqarput.

### **3. Pisortanut aningaasaqarnikkut allaffissornikkullu kingunerisassai**

Siunnersuutip pisortanut aningaasaqarnikkut allaffissornikkullu kinguneqarnissaa ilimagineqanngilaq.

### **4. Inuussutissarsiornermut aningaasaqarnikkut allaffissornikkullu kingunerisassai**

Siunnersuut inuussutissarsiornermut kinguneqassanngilaq.

### **5. Avatangiisinut pinngortitamullu kingunerisassai**

Siunnersuut avatangiisinut pinngortitamullu kinguneqassanngilaq.

### **6. Innuttaasunut kingunerisassai**

Inatsisip allap akuersissutigineqarnerata kingunerisaanik iluarsisaqarnissaq matumani pineqarmat inatsiseqartitsinermilu atuuttumi allanngortitsisoqassanngimmat siunnersuut innuttaasunut kinguneqassanngilaq.

### **7. Naalagaaffeqatigiinnermut aamma Namminersorlutik Oqartussanut tunngatillugu**

Siunnersuut aqputigalugu Inatsisartut inatsisaanni oqaatsit atorneqartut Namminersorneq pillugu Inatsimmut naapertuuttunngussapput. Siunnersuut naalagaaffeqatigiinnermut allatigut kinguneqassanngilaq.

### **8. Tusarniaaneq**

Siunnersuut ukunanut tusarniaassutigineqarpoq:

#### **KANUKOKA**

Ineqarnermut, Attaveqarnermut Angallanermullu Naalakkersuisoqarfik

Aningaasaqarnermut Naalakkersuisoqarfik

Aalisarnermut Piniarnermut Nunalerinermullu Naalakkersuisoqarfik

Inuussutissarsiornermut Suliffeqarnermullu Naalakkersuisoqarfik

Isumaginninnermut Naalakkersuisoqarfik maannakkut Ilaqutariinnermut, Kultureqarnermut,

Ilageeqarnermut Naligiissitaanermullu Naalakkersuisoqarfik

Peqqissutsimut Naalakkersuisoqarfik

Kultureqarnermut, Ilinniartitaanermut, Ilisimatusarnermut, Ilageeqarnermullu

Naalakkersuisoqarfik maannakkut Ilinniartitaanermut Ilisimatusarnermullu

Naalakkersuisoqarfik

Nunamut namminermut, Pinngortitamut Avatangiisinullu Naalakkersuisoqarfik

Kalaallit Nunaanni Eqqartuussivik

Kalaallit Nunaata Eqqartuussivia

Kalaallit Nunaanni Politimesteri  
Inatsisartut Ombudsmandiat  
Qaasuitsup Kommunia  
Qeqqata Kommunia  
Kommuneqarfik Sermersooq  
Kommune Kujalleq

Kalaallit Nunaata Eqqartuussisuuneqarfia, Nunatta Eqqartuussivianit, Kommune Kujallermit, Inuussutissarsiornermut Suliffeqarnermullu Naalackersuisoqarfimmit, Peqqissutsimut Naalackersuisoqarfimmit tusarniaanermut akissutinik tigusaqartoqarpoq kiisalu Aalisarnermut, Piniarnermut Nunalerinermullu Naalackersuisoqarfik oqaaseqaateqarsimanani.

Isumaginninnermut Naalackersuisoqarfik, massakkut Ilaqutariinnermut, Kultureqarnermut, Ilageeqarnermut Naligiissitaanermullu Naalackersuisoqarfiup § 28-mut tunngatillugu paasivaa kukkusumik imm. 2, nr. 5-imut innersuussisoqarsimasoq. Aalajangersakkami iluarsineqartoq siunnersuummut kingusinnerusukkut ilanngunneqarpoq.

Inatsisartut Ombudsmandiata tusarniaanermut akissuteqarnermini arlalinnik erseqqissaateqarpoq. Atorfeqarfiup oqaaseqaatai kingusinnerusukkut siunnersuummut ilanngunneqarput.

Allannguutit annertuutut isigineqanngimmata siunnersuutip nutaamik tusarniaassutigineqarnissaa pisariaqartutut isigineqarsimanngilaq.

## **Siunnersuummi aalajangersakkanut ataasiakkaanut oqaaseqaatit**

### *§ 1-imut*

Nr. 1-mut

Siunnersuutigineqarpoq Inatsisartut inatsisaanni qallunaatuumi tamani "Landsstyret" taarserneqassaaq taaguummik "Naalackersuisut" aamma § 14-mi, imm. 1, nr. 1-mi "landsstyremøder" taarserneqassaaq taaguummik "naalackersuisutmøder" Namminersorlutik Oqartussat eqqunnerarnera peqqutigalugu.

Nr. 2-mut

Siunnersuutigineqarpoq Kalaallit Nunaanni Namminersornerullutik Oqartussat-nut innersuussinerit tamani Kalaallit Nunaanni Namminersorlutik Oqartussat-mik taarserneqassasut Namminersorlutik Oqartussat eqqunnerarnera peqqutigalugu.

Nr. 3-mut

Aalajangersagaq iluarsisaqarnermik aallaaveqarpoq suliassallu suliarineqartarnerat pillugu inatsisip Kalaallit Nunaannut Pinerluttulerinermik Inatsimmut nutaamut naapertuuttunngorneranik kinguneqarluni. Siunnersuut aqputigalugu inatsiseqartitsinerup atuuttup allanngortinneqarnissaa eqqarsaataanngilaq.

Nr. 4-mut

Aalajangersagaq iluarsisaqarnermik aallaaveqarpoq suliassallu suliarineqartarnerat pillugu inatsisip Kalaallit Nunaannut Pinerluttulerinermik Inatsimmut nutaamut naapertuuttunngorneranik kinguneqarluni. Siunnersuut aqputigalugu inatsiseqartitsinerup atuuttup allanngortinneqarnissaa eqqarsaataanngilaq.

Nr. 5-mut

Aalajangersagaq naqqiissutaavoq eqqunngitsumit inatsisartut inatsisaannut atuuttumut innerssuussimmat.

*§ 2-mut*

Aalajangersakkami Inatsisartut Inatsisaata atuutilersinneqarnissaa aalajangerneqarpoq.

Siunnersuutigineqarpoq Inatsisartut Inatsisaat 1. januar 2012 atuutilersinneqassasoq.